

1 PETRO

Merepanika Petro Iokanatsopatakiti

1 ¹Petro nitxaua nota. Xesosi Kristo iokanatakiti nitxaua. Niokanatsopata hīte Xesosi sākire auiākanimoni. Hīte iarikape Pōto tixiniā, Karásia tixiniā, Kapatósia tixiniā, Ásia tixiniā, Pitxínia tixiniā pakini. Hītakanapari hīteka tixine Xesosi sākire hāuikini xika. Áti uākakata hāuanāta.

²Aīri Teoso mereēi hīte iua nakitiakori hininiua ĩkapani. Itixi kamiko apisa, iua imarotapekari hīte iua anaakori hininiua. Erekarī Matamatakoti parĩkauata hākixinireē Teoso nireēkitinoka hīkamini ĩkapani. Ininiā uatxa hīposotiire aua Xesosi Kristo paniātakiti hīkamini ĩkapani, kotxi Xesosi Kristo arēka xikepoata hīte ĩkapani. Teoso sikari ikinipoko erekari hītemoni. Itori isikai. Iteene ikamaerekaxiniretai.

Kākiti Maerekani Makatxakiko

³Mamisākiretari Teoso: “Peerekai pite. Aāuīte Xesosi Kristo Teosone pitxaua. Iua iri pitxaua,” matxari. Maerekati kamakaniua, iuaritika iteene iamoniākaua. Itxīkitakari axinire iuaīkana iponaniini, kotxi Xesosi Kristo ipina, iuaritika iuaīkana ōkitikaua. Ininiā ikiniōtika aimarotari Teoso kaminiri ikinipoko ikamaenetakiti.

⁴Iuaīkana axinire iponaniā, ininiā iua anaakori atxaua. Ininiā aīri potetakiti erekari aua itixineē aāpakapini ĩkapani. Ikara ipotetakiti lixipoka. !Oerēkata. Auapika. Teoso nīkatari ikara hīte ĩkapani.

⁵Hīte auikari Teoso sākire, ininiā iposotiire tokapakeētai hīte. Hīte itokapakeētiniritika Xesosi kanapiriāko xipokatxi ōtisaaki.

⁶Ikara himarota, ininiã iteene hîpoxokoniyata. Uatxa atxiîti !erekaxinirei hîte, kotxi ikini sereti maerekati apoka hîtemoni. ⁷Ikini sereti himaxikiko apoka hîtemoni, kotxi iusaaki Teoso imarotari atão hãuikiniri iua sãkire, himîteenekiniãri himaxikiko. Iusaaki Teoso ataerekatai hîte, oro ataerekatiko atokokana. Kãkiti axitaro oro otxiko makatxakiko îkapani, oronoka kaikotini îkapani. Iusaaki peerekaro. Pakaronero. Iuaritika âti ôti oxipokaãkako. Erekaroro, iuaritika apiaerekata hãuikiniri Teoso sãkire, kotxi isãkire hãuikini !ixipoka. Xesosi Kristo kanapiriãkasaaki îkorapokoriti, Teoso sãpiretaiko hîte: “Erekari hãuikiniri nisãkire, kotxi himîteenekari ikinipoko. Peerekai hîte,” itxaiko hîte. Iusaaki hiito iotximere auape Xesosi iotximere atokokana.

⁸Hîte kona aõkitapanikari Teoso, iuaritika hîtiretari iua. Kona hãtamapanikari, iuaritika hãuikari iua sãkire. Ininiã hîte iteene poxokoniyata. Kãkiti sãkireẽ !apakata hîsãpiretiniri hîpoxokoni. ⁹Hîpoxokoniyata, kotxi himaerekani makatxakaãkapeka. Ininiã hîxinire !ipinaika, kotxi hãuikari Xesosi sãkire.

¹⁰Kitxakapirîka Teoso sãkire sãpiretakani nirekamari imarotininirina kãkiti maerekani makatxakiko. Initarina ikara imarotininina Teoso sãkire iõkatsopatakoriã. Iteene apaiãkarauatana ikara imarotininina îkapani. Ninoa sãpiretari ikara erekari, Teoso âti ôti sikiniri kãkiti. ¹¹Inirekarina imarotininirina ikara erekari apokini ôti. “Kisaakipa apoka atxiîti? Natokopa itxa apokini?” itxanãtana. Iusaaki Erekari Matamatakoti oerekana ninoa ãkixinireẽna Kristo atatsiirauatini tîkane. Oerekana ninoa Kristo atatsiirauatini xipoka atoko, ikinimane auîte itxauako. Peerekari iusaaki. ¹²Kitxakapirîka Teoso sãpiretari ikamakiti tîkane isãkire sãpiretanimoni, kona ninoanoka imarotini îkapanini. Ninoa sãpiretari Teoso kamakiti tîkane hîte îkapani, kotxi uatxa apokapeka ninoa sãkire iaõka. Kitxakapirîka Teoso sãpiretari ikamakiti tîkane ninoamoni, ate uatxa imarotini îkapani. Teoso iokanapirena erekari sãpiretakani sãpiretapekai uatxa ikara Teoso sãpiretakiti kitxakapirîka. Teoso paniãtari Erekari Matamatakoti potirikini itixine uai apokini îkapani. Erekari Matamatakoti posotiireẽ ninoa sãpiretari Teoso iokanapirena erekari. Teoso nitiriakori iaxitikini iteene nirekamari imarotininirina hîte imarotakiti.

Ereka Hĩtxako

13Ininiã iposope hĩtxako hĩxinikiniri atão inakari hĩkamini. !Hĩkamapiri maerekati hiĩto nireẽkiti. Iteene hãuikariko hãpakapiniri ikinipoko erekari Teoso sikakiti Xesosi Kristo kanapiriãkasaaki. 14Amarini kaminiri iri paniãtakiti atokotxikana, hĩkamariko Teoso paniãtakiti. Xesosi sãkire himimarotakanisaaki, hĩkamari maerekati hinireẽkiti. Uatxa !hĩkamapinikariko. 15Hĩte akiritakari kamari erekarinoka, ininiã iua atokokana erekarinoka hĩkama ikiniõtika. 16Teoso sãkire iõkatsopatakori txari:

Erekarinoka hĩkamako, kotxi nota kamari erekarinoka, itxa Teoso kitxakapirĩka.

17Himisãkiretari hĩri iaxiti auakari. Atãonoka ikaminana ikinimane kãkiti iparĩkana atamatakasaaki. Ininiã kãkiti kamakasaakiri maerekati, aĩri misiritiniri ãti atokotxikana, imisiritari ãti. Himitekini !auari. Hĩxinikariko, haãpoko atão inakari ãkorapokoriti !auari. Teoso tixineẽ aua haãpoko. Ininiã ãkorapokoriti hãuakasaaki, iteene hĩpaxitariko Teoso. Hĩpĩkariko iua manirekakiniti hĩkamini. 18Mitxi !apakata hãuini, kotxi iuasaaki hĩkamari hãtokiriakorini sãkire iaõka. Uatxa Xesosi oerekai ãtião hãuini, kotxi iamotai hĩte, iua nakitiakori hininiua ãkapani. Himarotari iamotini. !Iamotai pirataã. !Iamotai oroã. !Iamotai txineiroã, kotxi pirata, oro, txineiro pakini xipokako. 19Kristo arẽkaã iamotai hĩte, kotxi ipĩkasaaki iamotai hĩte. Peerekari iua arẽka, kotxi iua arẽka makatxakari amaerekani. Soti auĩte erekari atoko itxa Kristo. Kona maerekati aua iuamoni. 20Itixi kamiko apisa, Teoso mereẽri iua. Iua apoka uai himaerekani imakatzakini ãkapani. 21Xesosi txĩkitakai hĩte auikiniri Teoso auini, kotxi Teoso iuaĩkana õkitikari Xesosi ipĩkani sauaki. Iuasaaki isãpiretari Xesosi ikinika ikamakiti ereka inini. Ikara atoko ininiã, hãuikari Teoso sãkire. Himarotari isãkire iaõka ikamini. 22Erekari Matamatakoti oerekapekai atão inakari, ininiã uatxa hĩkamari atão inakari. Ikara atoko ininiã, hãkixinire erekari. Ininiãkara atão hĩtiretari hĩtariakori. Ininiã iteene hĩtiretakakauako hãkixinireẽ.

23Hĩte xinire iuaĩkana iponaniãpeka. Teoso sãkireẽ hĩxinire iponaniã iuaĩkana. Teoso sãkire auapika. !Iixipoka. Ininiã iua anaakori hĩtxaua. Hĩri ãkorapokoriti auakani xipoka. Hĩri iaxiti auakari !ixipoka, ininiã hĩte iua anaakori !ixipoka apaka. 24Teoso sãkire iõkatsopatakori txari:

Kākiti katsotati atoko itxa. Katsotati paītiki ipinini. Iua atokokana patimari kākiti ipina. Ikinika erekari ikamakiti, aāui atoko itxa. Aāui patimari ipinini. Iua atokokana patimari kākiti kamakiti xipokini.

²⁵ Iuaritika Teoso sākire auapika. !Kaxiporeri, itxa Teoso sākire iōkatsopatakori. Teoso sākirepitikara sāpiretaākapeka hītemoni, hīkenakotakasaakiri Teoso iokanapirena erekari.

2 ¹ Ininiākara hītakanapariko ikinipoko maerekati hīkamakiti. !Himisirienetapiri āti. Hīkamariko hīsākire iaōka. !Hīxikotapiri āti. !Himisākirepiretapiri āti. Ikini sereti maerekati kākiti kamakiti hītakanapako.

² Hinirekariko Teoso sākire makoketakoti. Tinitxiā imi axapitiri nirekini atokokana, hinirekariko Teoso sākire. Teoso sākire hāpakapakasaaki, himaroāpotari iua, ininiā apiaāpota hāuikiniri iua sākire. ³ Kotxi uatxa himarotapekari Apiananiri ereka inini.

Kai Atoko Itxa Xesosi

⁴ Ininiā hīsako Xesosimoni, kotxi auapika inakari itxaua. Kai aapokotxi kamakari manirekakiniti atoko itxa Xesosi. Kākiti linirekari iua. Iuaritika Teoso mereēri iua. Teoso tiretakiti itxaua Xesosi. ⁵ Hīte apaka kai atoko hītxaua Teoso aapoko ikapani. Itxīkitakari hīxinire auāki inini, kotxi iua nakitiakori hītxaua. Ininiā, Teoso aapoko atoko hītxaua. Ininiā iua aapoko āki sasetotxi hītxaua, iua ikapani hīparīkauatini. Ininiā hīsikariko iua amanaākiti, iua nireēkiti. Iua apakapariko hīsikakiti, kotxi Xesosi Kristo makatxakapekari himaerekani. ⁶ Teoso sākire iōkatsopatakori txari:

Hātamata. Nitakari kai Siāo sitatxitiā. Iua kai apiari, Teoso mereēkiti. Apiaerekata iua. Iua kai atoko inakari sākire auiākani !ipētauata, itxa Teoso sākire.

⁷ Iua kai atoko inakari itxaua Xesosi. Peerekari Xesosi hītemoni, kotxi hīte auikari iua sākire. Āti iua atoko inakari !uari. Txamari isākire makīpitakani linirekari iua. Teoso sākire iōkatsopatakori txari:

Aiko kamakani txari: “!Apakata ia kai. !Anirekari.” Iuaritika iua kai apiari. Itakaāka aiko kamikosaaki, apanakini kai soro maīkakari ininiua ikapani.

⁸ Iuaīkana Teoso sākire iōkatsopatakori txari:

Iua kai xika kākiti mākitita. Iua kai xika kākiti irika,

itxa Teoso sākire. Imākititana, kotxi !auikarina Teoso sākire. Teoso txīkitakana ninoa irikini, kotxi !auikarina iua sākire.

⁹Hītepekana, Teoso mereēkini hītxaua. Sasetotxi hītxaua. Hīparīkauata Apiananiri īkapani. Hīte makatxakaāka maerekani sauaki erekarinoka hīkamini īkapani. Teoso nakitiakori hītxaua. Imereēi hīte iua ereka inini kākiti hōerekini īkapani, kotxi ipiā hāuakasaaki, iuara akiritai hīte ipiā hītakanapini īkapani. Itakai ikamaraā atāo inakari himarotini īkapani. Peerekari iua kamara. ¹⁰Mitxi Teoso nakitiakori !hītxaua. Uatxa Teoso nakitiakori hītxapekaua. Mitxi Teoso !amonīkapanikai. Uatxa Teoso amonīkapekai.

Teoso Nitiriakori Iamotakoni Pirena

¹¹Nitiretakini, uai itixi hāuakasaaki, āti tixinikini atoko hītxa. Atāo hāapoko Teoso tixine aua. Īkorasaaki hīsaāpota hāapokomoni. Ininiā ikini nixinireritika nōtākikai hīte himakamakaniri maerekati hīito nireēkiti. Hīito nireēkiti hīxinire mokaiakari atoko itxa. Hīito !inirekari hīxinire nireēkiti. ¹²Teoso sākire mauīākani sauaki hāuakasaaki, ikiniōtika erekarinoka hīkamako. Atxiīti ninoa maxikatiīka apoītai maerekati hīkamini, iuaritika iuasaaki ninoa imarotari erekarinoka hīkamini. Ininiā Teoso ketotini ōti manapi iua oerekariko atāo inakari ninoamoni. Ininiā iuasaaki ixinikarinako erekari hīkamakiti. Ininiā itxarinako Teoso: “Peerekai pite,” itxana.

Hīkamariko Hīauīte Paniātakiti

¹³Hīkamariko kākiti auītetakini paniātakiti, kotxi Apiananiri nirekari ikara atoko hīkamini. Ikinimane hīauīteakori paniātakiti hīkamako. Hīauīte apiari paniātakiti hīkamako. ¹⁴Hīauīte poiāori paniātakiti apaka hīkamako, kotxi hīauīte apiari paniātana hīauīte poiāorini maerekati kamakani imisiritinina īkapani. Ipaniātana ninoa isāpiretinina erekari kamakani: “Erekapitikari hīkamakiti.” ¹⁵Teoso nirekari hīkaminiri erekari, ininiā iuasaaki miīkiteni !iposotari imisākirepiretinii hīte. !Kasākirena iuasaaki, kotxi apanakini imarotari erekarinoka hīkamini. ¹⁶Hīposotari ikinipoko hinireēkiti hīkamini, kotxi Teoso sikakai hīte. Iuaritika kona hinirekapiri maerekati hīkamini. Teoso nitiriakori hītxaua, ininiā iua paniātakinoka hīkamako. ¹⁷Hīpaxitariko ikinimane. Hītiretanako ikinimane aītariakori Teoso sākire auīākani. Hīpīkariko Teoso. Hīpaxitariko hīauīte apiari.

Hīkamariko Hīpatrāote Paniātakiti

18 Nitiritxiakori, hīkamariko hīpatrāote paniātakiti. Hīpaxitariko iua. Atxiīti iua tiretai. Atxiīti imisiritai. Iuaritika hīpaxitariko iua. 19 Erekapitikari himīteenekiniri kākiti misiritinii maxikatiīka. Himīteenekiniāri, Teoso nireēkiti hīkamini īkapani, erekapitikari. 20 Erekarī hīpatrāote misiritinii hīte, maerekati hīkamakasaaki. Iuasaaki himīteenekiniri himisiritiko kona txīkitakari Teoso apokaerekatinii. Erekarī hīkamakasaaki, himīteenekiniāri himisiritiko, iuasaaki Teosomoni erekapitikai.

Kristo Misiritiko

21 Teoso akiritai hīte inakitiakori hininiua īkapani, himisiritiko himīteenekini īkapani. Kristo misiritaāka hīte īkapani, ininiā iua nirekarī amīteenekiniri amisiritiko iua misiritiko imīteenekini atokokana.

22 Maerekati !ikama. !Imisirienetari āti. 23 Ninoa misākirepiretakasaakiri iua, !apakapaenetana. Imisiritakasaakirina iua, !itxitana. !Isāpiretana imisiritinina imaerekanina xika. Iua auikari iri nīkatiniri iua, kotxi atāonoka kamakari itxaua Teoso. Atāo imarotari kākiti kamakiti. 24 Aamina ĩpiriāmitakari nopini Xesosi ĩto misiritaāka ate maerekani xika. Ipina ate īkapani, apikomoni maerekati akamini amanirekakani īkapani. Inirekarī anireēkiti maerekati ipīkari atoko inini. Itxīkitakari axinire auāki inini atāo inakarinoka akamini īkapani. Xesosi karo txīkitakaua erekape anini. 25 Xesosi himarotini apisapanika, soti auīte pīpinanakakani atoko hītxa. Uatxa hīkanapiriāpeka hīpitikirimoni. Hīxinire nīkatarimoni hāpokapeka uatxa.

Taniritxi, Tanorotxi Pakini Ōtākikiko Pirena

3 1 Nitiritxi kaminiri ipatrāote paniātakiti atokokana, hīte tanorotxi hīkamariko hītaniri nireēkiti. Atxiīti hītaniri !auikari Teoso sākire, ininiā erekarinoka hīkamako. Amatakasakirina erekari hīkamakiti, ninoa auikari Teoso sākire. Hīkamakiti erekari txīkitakana auikinirina Teoso sākire. Hīsākirenoka !itxīkitakana auikinirina. 2 Maerekati himakamakanisaaki ikiniōtika, Teoso iteene hīpaxitiniā ikiniōtika, iuasaaki ninoa auikari Teoso sākire atāo inini.

³Apanakini sito xinikapikari oiãko oõeretini, oro oiãtoã otakini, omãka ereri oieretakini, oiãto ere inini ikapaninani oxinika. Sito erero !oxinikari ikaranani. ⁴Sito erero oiãkixinire ereri apaka. Hãkixinire ereri inakasaaki, ikara ereri !ixipokapani. Hãkixinire ereri inakasaaki, !hĩtxitapiri hĩtaniri. Hĩkamari iua nireẽkiti. Teosomoni apiaerekata hãkixinire ereri inini.

⁵Kitxakapirĩka sitoãkini ererini, Teoso sãkire auĩãkani, ikara atoko inakani. Ninoa ãkixinire erekari, kotxi ikĩpitarina itanirina sãkire. ⁶Sara inakoro kamari Apraão sãkire iaõka. Oa kamari Apraão paniãtakiti, kotxi oamoni oa auĩte itxaua Apraão. Sara anaakoro atoko hĩtxaua atãonoka hĩkaminiã, himapĩkarauatakaniã.

⁷Hĩte taniritxi, iua atokokana hĩxinikariko erekari hĩkaminana hĩtanoro. Hĩpaxitaroko hĩtanoro, kotxi !katapararo. Oa apaka hĩtekata apakapariko Teoso sikakiti erekari. Iua txĩkitakai hãuapininiika hinini iuakata. Hĩtiretaroko hĩtanoro, ininiã Teoso kenakotariko himisãkiretiniri iua.

Hisisiritiko Pirena

⁸Ia nisãkire mapotõkire nisãpiretai. Hĩxinikakiti ãtika xinikakiti atoko hĩtxako. Hiamonĩkakauako. Hĩtiretariko ãti, hĩtari hĩtiretini atokotxikana. Hĩkamariko erekari ãtimoni. !Hĩuikapeua. ⁹Ãti kaminiãri maerekati hĩtemoni, !hĩkamapiri maerekati iuamoni. Ãti misãkirepiretakasaakii, kona hĩte misãkirepiretapiri iua. Ãti kaminiãri maerekati hĩtemoni, iusaaki hamanaãri Teoso sikiniri erekari iuamoni, kotxi Teoso paniãtai ikara atoko inakari hĩkamini, erekari Teoso sikakiti hĩte apaka apakapini ikapani. ¹⁰Teoso sãkire iõkatsopatakori txari:

Pinirekiniãri pauini ereka inini, pinirekiniãri ikiniõtika pipoxokoniuatini, !pauiritapiri pisãkire maerekati inini. !Pimisirienetapiri ãti.

¹¹Pinirekiniãri pauini ereka inini, pitakanapariko maerekati pikamini. Erekarinoka pikamako. Pitakanapariko pineenamauatini. Pinirekariko kãkiti auini ereka inini.

¹²Apiananiri nĩkatari kãkiti atão inakari kamakani. Teoso imisãkiretakasaakina, Teoso kenakotapitikari isãkirena. Txamari Apiananiri misiritari maerekati kamakani, itxa Teoso sãkire kitxakapirĩka.

¹³Erekari hĩkamakasaaki, kãkiti !inirekari imisiritinii. ¹⁴Atão inakari hĩkamakasaaki, kãkiti misiritiniãi, hãpakapariko erekari

Teoso sikakiti. Ininiã !hĩpĩkapena ninoa. Maerekaxiniretinoka !hĩtxape. ¹⁵Hãkixinireẽ hĩtxako: “Teosonoka niauĩte. Apiananiri itxaua. Iua nireẽkitinoka nikamako.” Ikara atoko hĩtxako. Hãpaiaõkariko Teoso sãkire, isãkire iteene himarotini ĩkapani. Ininiã kãkiti pimainiã: “Kinirepa hãuikari Teoso sãkire?” Iuasaaki himarotari hãpakapapiretiniri iua. Hãpakapapiretakasaakiri iua, !hĩtxitapiri. Hĩpaxitariko iua iuasaaki. ¹⁶Hĩsãkirauatakasaaki, !hĩsãpiretapiri hãkixinire manirekakiniti. Hinirekariko erekari hãkixinire nireẽkiti hĩkamini. Apanakini misãkirepiretai. Ninoa atamatakasaakiri erekari hĩkamakiti Kristo paniãtakiti, ipõtatarı imisãkirepiretinii. ¹⁷Teoso nirekiniãri hãtatsiirauatini erekari hĩkamini xika, ininiã erekari, kotxi iuasaaki hĩkamari erekari. Txamari hãtatsiirauatiniã himaerekani hĩkamini xika, !erekari, kotxi iuasaaki hĩkamari maerekati.

¹⁸Xesosi Kristo ipina kãkiti maerekani imakatzakini ĩkapani. Iuasaaki iposope imakatzakiniri kãkiti maerekani. Iuaĩkana !atatsiirauataika kãkiti maerekani imakatzakini ĩkapani. Erekarinoka kamakari ipĩpe maerekati kamakani ĩkapani. Ipĩpe, Teosomoni ate anikini ĩkapani. Iĩto ipĩpe, iuaritika Erekarı Matamatakoti txĩkitakari iua iuaĩkana auãki inini. ¹⁹Iuasaaki Erekarı Matamatakoti posotiireẽ isari ipĩkani auiniãtaãmoni. Iuaã kateia ãki ipĩkani aua. Iuaã isãpiretana Teoso misiritinina ninoa, kotxi iuaka kãiata. ²⁰Kitxakapirĩka ninoa ipĩkani, auãkipanika inakasaakina, !nirekarina Teoso paniãtakiti ikaminina. Iuasaaki Noee kamanãtari maporo. Teoso iãtapana imaerekanina itakanapinina ĩkapani. Txamari !itakanaparina. Iuasaaki poiãonoka !ipina. Oitonoka !ipina, xirataãtxi apokasaaki. Teoso nĩkatana ninoa imapinakani ĩkapani. ²¹Ikara xirataãtxi hĩpatxisatiko atokokana. Hĩpatxisatiko oerekari kãkiti, Teoso makatzakapekai himapinakani ĩkapani. Hĩpatxisataãka hĩtoãkiri txiko makatzakiko !ĩkapanini, kona maerekati hĩkamakiti makatzakiko ĩkapanini. Hĩpatxisatikosaaki, hĩtxari Teoso: “Nãkixinireẽ ninirekarı nikaminiri ikinika pite nireẽkiti iaõka,” hĩtxariko. Xesosi iuaĩkana õkitikasaakiua, imakatzakai himapinakani ĩkapani. ²²Iua kanapiriã Teoso tixinemoni. Uatxa iri kikomoni iitopãka. Iuaã Teoso nitiriakori, auĩtetxiakori, kaposotiirerini pakini auĩte itxaua. Ninoa ikinika kamari Xesosi paniãtakiti.

Hĩkamariko Ikinipoko Teoso Nireẽkiti

4 ¹Xesosi atatsiirauata iĩtoã hĩte ĩkapani. Ininiã hinirekariko Xesosi xinikakiti iaõka hĩkamini. Ikara atoko hinirekiniã, hĩxinikakiti

sikataparatarari hākixinire. Kākiti atatsiirauatakasaaki iītoā, !nirekaikari maerekati ikamini. ²Ininiākara ikorapokoriti auakasaaki, !nirekaikari maerekati iīto nireēkiti ikamini. Ikamari Teoso nireēkiti iaōka ikiniōtika. ³Mitxi maerekati hīkamakiti iaōpe. Mitxi Teoso sākire mauīākani nireēkiti iaōka hīkama. Ikini sereti maerekati hīkama iusaaki. Iusaaki hīkamari ikini sereti hīto nireēkiti. Hinirekari āti kākiti iito. Hīpoāta. Ikinipoko maerekati hīkama hīpoātakasaaki. Hīkamari kiiniri maerekati. Hīteosonetari kākiti kamakiti, Teoso mauritakiniti.

⁴Ninoa Teoso sākire mauīākani txai: “Kinirepa kona hīpotxitari ate kamakiti iaōka hīkamini? Peerekari akamakiti,” itxaina. Ininiā ninoa nireēkiti iaōka himanirekakani xika, ninoa misākirepiretai hīte. ⁵Txamari āti ōti ninoa apakapapiretariko Teoso, kotxi Teoso iposope isāpiretiniri maerekati kamakani misiritiko. Isāpiretari kākiti auākipanika inakani, apaka kākiti mitxi ipīkani. ⁶Ininiā Teoso iokanapirena erekari sāpiretaākapeka kākiti. Uatxa ninoa ipīpe. Auākipanika inakasaaki, isāpiretaāka ninoamoni kākiti misiritiko imaerekani xika. Isāpiretaāka ninoamoni kākiti kaminiri Teoso nireēkiti ākixinireē ikiniōtika.

⁷Imakinika xipokini ōti imatokotapeka. Ininiā kona hāuiritapiri hīto kaminiri inireēkiti. Araōkire hītxako, ininiā hīposotari himisākiretiniri Teoso. ⁸Iteene hītiretakakauako. Ia apiata Teoso nirekakiti. Iteene hītiretakakauako, kotxi iteene hītiretiniāri āti, poiāo hīxinikari maerekati ikamakiti. ⁹Kākiti apokasaaki hāapoko, hīpoxokoniritika hāpakapanako. Kona hītsoatape hākixinireē ninoa apokini xika. ¹⁰Hikinika hāpakapapekari imaroretxi Teoso parīka hīkamini ikapani. Ikara Teoso sikakiti hītemoni. Ininiā ikara himaroreē hīparīkauata apanakini ikapani. Iusaaki Teoso nitiriakori erekarini hītxaua. Hīsikariko ātimoni ikini sereti erekari Teoso sikakiti. ¹¹Hīsākirauatakasaaki, hīsāpiretariko Teoso sākire kākitimoni. Himoianatakasaakiri āti, himoianatariko Teoso posotiireē, ininiā iusaaki kākiti txari Teoso: “Peerekai pite, kotxi Xesosi Kristo nakitiakori atxaua,” itxari Teoso. Ātipirika ikinimane txapikari Teoso: “Peerekai pite. Ikinipoko posotiiretxi aua pitemoni.” Ameē.

Xesosi Sākire Auiākani Misiritiko

¹²Nitiretakini, !hītikokape himisiritiko apokasaaki, kotxi ikara ataerekatai. Iteene himisiritaākako, kotxi ikara atoko inakari apokapitikako. ¹³Iusaaki hīpoxokoniuatako, kotxi

Xesosi atatsiirauatape, ininiã hĩte apaka atatsiirauatako. Xesosi kanapiriãkasaaki, peerekari iusaaki. Hĩte amatariko ikara, ininiã iusaaki iteene hĩpoxokoniua. ¹⁴Kãkiti xinitakasaakii hĩte, Kristo nakitiakori hininiua xika, hĩpoxokoniuaatako, kotxi iusaaki himarotari Teoso aua hĩtekata. Himarotari Erekaru Matamatakoti aua hãkixinireẽ. ¹⁵Kokaniri, kiĩtiriri, maerekati kamakari, aãpirena kamakari pakini !hĩxapeuako. Ikara atoko inakari hininiãua, apakatapitika hãtatsiirauatini, kotxi hãtatsiirauata maerekati hĩkamini xika. ¹⁶Iuaritika hãtatsiirauatiniã Xesosi sãkire hãuikini xika, ininiã iusaaki erekapitikari. !Hĩpẽtauatape. Hĩtxariko Teoso: “Peerekai pite, kotxi Xesosi nakiti nitxaua,” hĩtxako. ¹⁷Apokapeka Teoso anaakori misiritiko õti. Merepanika Teoso misiritari iua anaakori imaerekanina xika. Teoso misiritiniãua ate isãkire auĩãkani amaerekani xika, ininiã Teoso iokanapirena erekari manirekakani mitekini !uari. Iteene imisiritana ninoa. ¹⁸Kitxakapiriãka Teoso sãkire iõkatsopatakori txari:

Pamimari atão inakari kamakani sini Teoso tixinemoni.

Ininiãkara Teoso manirekakani mitekini, maerekati kamakani mitekini !uari. Imisiritaãkapitikanako, itxa Teoso sãkire. ¹⁹Apanakini atatsiirauata, kotxi Teoso nirekari atatsiirauatini. Ikara atoko hãtatsiirauatiniã, iuaritika erekari hĩkamapanikako. Hãuikariko ikinipoko kamakari sãkire, kotxi iua kamari ikinipoko isãkire iaõka.

Kõtãkikarerini, ãtokoriakori Pakini

5 ¹Kõtãkikareri nitxaua nota, ininiã nõtãkikai hĩte kötãkikarerini. Nota amataru Kristo misiritiko. Ikanapiriãkasaaki, natamataru iua iotximere ikinimane auĩte inakasaakia. ²Ininiã nota õtãkikai hĩte. Hinĩkatanako Teoso sãkire auĩãkani ereẽ. Soti auĩteakori ipitikiri nĩkatini atokokana, hinĩkatana. Hĩsãpiretanako Teoso sãkire, kotxi ikara sikakienataru ninoa ãkixinire. Teoso sikana ninoa hĩtemoni hinĩkatinina ãkapani. Atão hinirekariko hinĩkatinina ninoa. Kona hĩtxape hãkixinireẽ: “!Ninirekari ninĩkatinina ninoa, iuaritika ninĩkatana, kotxi ikara nipaãka.” Kona hĩxinikapiri ikara atoko inakari. !Hĩpaãkauatape txineiro hãpakapini ãkapani. Hĩpaãkauatako apanakini himoianatini ãkapani. ³Ninoa auĩte atoko !hĩtxapeua. Teoso sikana ninoa hĩtemoni hinĩkatinina ãkapani, soti auĩteakori ipitikiri nĩkatini atokokana, ininiã erekari hĩkamako, hĩte kamakiti iaõka ninoa kamini ãkapani. ⁴Ininiã ipitikiri apiari apokasaaki, Xesosi apokasaaki, hãpakapariko hĩpaãka

ĩki. Iuasaaki hãpakapariko saporĩeta atoko inakari. Ikara Teoso sikakiti peerero, ininiã ikara apakapakani auapininiika. Atamatapikarina Teoso iotximere. Iuasaaki erekari hãpakapakiti !ixipoka.

⁵Hĩte ãtokoriakoripekana, hĩkamariko aneẽkani paniãtakiti. Hĩkinika, himoianatakakauako. !Hĩuikapeua, kotxi Teoso sãkire iõkatsopatakori txari:

Teoso iotokakari iuikakaniua kaminiri inireẽkitina. Iua sikari ikinipoko erekari miuikakaniuamoni.

Itxa Teoso sãkire. ⁶Ininiã hĩteka poiãotakauako, kotxi Teosonoka kaposotiireri. Iketo manapi Teoso iuikai hĩte, erekari hĩkamakiti isãpiretiniri ikinimane. ⁷Maerekaxiniretinoka hinakasaaki, imakinika himaerekaxinire hĩsãpiretariko iua. Hĩsìkariko himaerekaxinireni iuamoni, kotxi iua tiretai.

⁸Kona hĩkamapiri hĩito nireẽkiti. Araõkire hĩtxako, kotxi himokaiakari Satanasi inakori ãkiti monõkori atoko itxa. Isaãpota initiniri ikiena. ⁹Satanasi apokasaaki hĩtemoni, iteene hãuikariko Teoso sãkire. Iuasaaki hĩtaparaxinireritika hãuako. !Himitekape. !Hĩkamapiri inireẽkiti. Himarotari hĩtariakori ikini itixiti auakani atatsiitiniri imisiritikona hĩte atatsiirauatini atokotxikana. ¹⁰Hĩte atatsiirauatako poiãonoka, eereka Teoso parĩka hãkixinireẽ iposope ikamini. Iua sikataparaxiniretai. Iteene hãuikari Teoso sãkire iuasaaki. Satanasi !iposotari itxĩkitakinii maerekati hĩkamini iuasaaki. Teoso, ikinipoko erekari sikakari, kamari ikara atoko inakari hĩte ãkapani. Iua akiritai itixine hĩsini, ãtipirika hãuini ãkapani, iua iotximere ãtipirika hãtamadini ãkapani, kotxi Kristo Xesosi nakitiakori hĩtxaua. ¹¹Ãtipirika ikinimane txari iua: “Peerekai pite.” Ãtipirika ikinimane auĩte itxaua. Ameẽ.

Petro Takapiretanapini

¹²Sĩrasi moianatano ia niõkatsopatakiti axapitiri niõkatsopatini hĩte ãkapani. Iua aĩtari. Iua iteene auikari Xesosi sãkire. Niõkatsopata hĩte nisikataparaxiniretini ãkapani. Ninirekari himarotiniri atã asãpiretinii erekari Teoso sikakiti pirena. !Hĩtakanapapiriko erekari Teoso sikakiti hĩtemoni. ¹³Teoso nakitiakori, Papirõnia sitatxiti auakani, xinikamanapitai hĩte. Teoso mereẽna ninoã hĩte imereini atokotxikana. Marko, namarite atoko inakari, xinikamanapitai hĩte apaka. ¹⁴Haõkitakakasaakiua, himaratakakauako, kotxi hĩtiretakakaua. Teoso kamaerekaxiniretai hĩte Kristo Xesosi sãkire auĩãkani. Ameẽ.